

影印

文淵閣四庫全書

第一一五五冊

北京出版集團公司
北京出版社

本冊目次

欽定四庫全書

乾道稿 淳熙稿 章泉稿 雙溪類稿 止堂集

宋趙蕃撰……………一

宋王炎撰……………四二一

宋彭龜年撰……………七五九

欽定四庫全書

集部

乾道稿卷上

詳校官庶吉士臣吳烜

主事臣呂雲棟覆勘

總校官編修臣朱鈐

校對官編修臣陳昌齊

謄錄監生臣梁天重

欽定四庫全書

集部四

乾道稿 淳熙稿 章泉稿 別集類三 宋

提要

臣等謹案乾道稿淳熙稿章泉稿三集並宋

趙蕃撰蕃字昌父號章泉先世鄭州人建炎

初其曾祖暘官於信州因家焉蕃以暘致仕

恩補官後終直秘閣蕃始受學劉清之年至

五十始問學於朱子朱子文集與蕃尺牘凡

欽定四庫全書

乾道稿
提要

六首蕃與朱子往還詩及他作之稱述朱子

者亦二十餘首其相契頗深朱子答徐斯遠

書有云昌父志操文詞皆非流輩所及且欲

其刊落枝葉就日用間深察義理之本然庶

幾有所據依以造實地不但為騷人墨客而

已所以期許之者亦甚至然蕃本詞人晚乃

講學實未嘗有所論著其究也仍以詩傳與

澗泉韓澆有二泉先生之稱澆集久佚今從

永樂大典哀輯已別著錄蕃集亦無傳本而
永樂大典所收頗富併為採假編次依舊本
標題釐為乾道稿二卷淳熙稿二十卷章泉
稿五卷共計二十七卷而以蕃本傳及劉宰
所作墓表附錄於後初蕃為太和簿時受知
於楊萬里萬里贈詩有云西昌主簿如禪僧
日餐秋菊嚼春冰又云勸渠未要思舊隱且
與西昌作好春又為作寫真贊云貌恭氣和

欽定四庫全書

乾道稿
後要

二

無月下推敲之勢神清骨聳非山頭瘦客之
容一笑詩成萬象春風云云則其詩派實出
江西劉克莊跋亦云近歲詩人惟趙章泉五
言有陶阮意所作後村詩話錄其詩頗夥詩
人玉屑載蕃論詩一則以陳后山寄外舅詩
為全篇之似杜者後戴式之思家用陳韻又
全篇之似陳者觀所品題其淵源亦可概見
矣乾隆四十九年十一月恭校上

總纂官_臣紀昀_臣陸錫熊_臣孫士毅
總校官_臣陸費墀

欽定四庫全書

乾道稿
後要

三

欽定四庫全書

乾道稿卷上

宋 趙蕃 撰

五言古詩

東坡在惠州窘於衣食以重九近有樽俎蕭然
之歎和淵明貧士七詩今去重九三日爾僕以
新穀未升方絕糧是憂至於樽俎又未暇計也
因誦靖節貧士詩及坡翁所和者輒復用韻

欽定四庫全書

乾道稿
卷上

故鄉墮渺茫迺此窮山依力業困乏資蕭颯如秋暉人
生初無根歲月著翼飛更堪幾寒暑蔓草真同歸與懷
死後名不補身前饑已矣勿多譚寧能置深悲

淵明生亂世何意爭鶴軒念歸非一日寓說因田園不
嗟瓶儲空寧歎竈絕烟聲名向千載誰得加磨研孟軻
論尚友我亦佩此言古人未易誣今代無茲賢

誰云鍾期死伯牙遂忘琴淵明出晉宋東坡作知音究
其出處間咀嚙皆直尋和詩固亡恙端若一手斟我時

誦其集危坐常加欽細懷兩先生千古同此心

四皓逃南山下視衣褐妻不知建成客孰與封君酬夷
齊古逸民食粟猶耻周何曾墮人計圖安卒成憂不然
靖節翁那與沮溺倚頽于一日間無羨斯無求

去年迫重九倦游正長干稅駕僧崖古無從借船官今
年山中居朝暮無續餐朔身謾九尺何時辭餒寒貨殖
賜何有單馱未臞顏因知昔人意道勝貧非關

閒居起常早倦巾首如蓬偶繙西都書意外文字工清

欽定四庫全書

乾道稿
卷上

名誰為高凜凜惟楚龔當時豈無人罕與二子同乃知
士生世不貴侯籍通九原如可作何憚執鞭從

昔在龐德公有足不入州鸞鳳自有志燕雀安可儔迺
知金石堅不逐萬物流當時天下事固為長者憂未易
一木支殺身何能酬令人為短氣哀哉融與修

謁文叔于松谷

鷄鳴戒柴車月落到林寺先生方睡美童子驚客至晨
霜染屋瓦初日照平地雖非贊公宿似是超師誼分攜

屬秋風條忽竟此歲相望不為遠數見良不易公行立
朝班我政親農耜自茲出處殊寧使心迹異歡華一朝
寵風節千古事要令松谷名因公表於世

自玉山歸竹隱投宿廣平院

久客倦城市薄言歸田廬抹馬待日歛顛風忽來俱橫
策徑成去撲撲埃滿鬚晴雷隱虛空數雨如投珠渴甚
念茗飲遲回尋梵居少焉復前邁行行過烟墟但驚田
疇間有似稿復蘇及經道途衝餘流尚通渠乃悟適來

欽定四庫全書

乾道稿
卷上

三

兩咫尺或有無天公本何心分龍信非誣自茲到吾樓
崗嶺更複迂山窮偶逢寺可以休僕痛投鞍議食事僅
具粥一盂道人吾故人問我來崎嶇既能設瓜果村酒
亦復沽我愧非淵明僧誠遠公徒停杯竟高枕夢境知
何如明當帶星起草露徒侵裾還家一何忙視竹齊架
書優哉且自適休問瓶無儲

道興二首

秋清意自佳況此山崦靜今晨風日暖亦復起我病叢

深木屢多激烈香成陣何必蒼苔林方能明佛性
西風何從來驚我庭下綠竹君了不知儼立若帶東山
居陋無友弔影唯吾僕得此助婆婆寧能嘆幽獨

寒夜曉起呈斯遠

黃昏月甚佳夜半風忽起直疑天又變况覺寒逾水破
衾不能溫曲身豈復論牕明亟問似霜裏明朝瞰梅開
何處樹索莫誰能顧被褐復扶筇從君覓詩去

晨起

欽定四庫全書

乾道稿
卷上

四

布衾失餘溫紙窓微微明霜粲萬瓦白江可一葦橫故
園菊應荒邛岸梅且榮客遊胡滯留歲事行崢嶸

幽居

窓前亦何有有槐儼而長植之自誰歟花開幾經黃那
知窓中人不作昔日忙但戀六月蔭超然傲羲皇

得晴欲過江訪梅已忽病作天亦復陰悵然有

賦

立春數日間梅花未多睹書窓有折枝每浸則微吐殘

編宵未眠卯酒朝自舉時聞逸幽香似接譚妙語林園
何人家厥地非容與曾知將軍祠老木瞰江潯時中幾
及之欲往遭雪阻莫要居士麴但費先生楮前朝得霜
霽決意喚鳴擗肩輿已出門邂逅謁吾侶忽焉頭岑岑
歸卧更侵僭或者瘡為祟又意瘴莫禦杯錯且棄置樂
餌事煎煮豈唯病獨然陰雲重彌宇羲之嗜山水誓基
不自許涪翁訪岑公亦歎連朝雨世人肆貪求妄意輒
替組寧知一笑適亦自有從拒天雲會當開我病亦應
愈但恐梅之花踰蹊如化羽

欽定四庫全書

乾道稿
卷上

五

從孫一昆仲求毗陵筆

宣城死諸葛管城不中書我無操舟長顧病河流紆朝
來罷茶甌閑詩念追摹毛錐不勝任一戰驚摧車孫郎
吳中回此物富有餘日云得祕法盡口絕覲覲君今英
妙年賦成似相如自宜給筆札奏技承明廬非如寒窻
人章句分錙銖多貯竟胡為何妨稍遺余

七言古詩

遠齋作十二辰歌見贈且帥同作

蟲臂鼠肝能幾許何如徑駕牛車去虎頭未必果癡絕
死穴舊來輸狡兔先生端是人中龍為蛇畫足吾何功
士窮有愧食穀馬況乃爛羊關內封春風開花到猴李
白酒黃雞思下里賦因狗監笑相如猪肝不食寧為說
題歸去來圖

淵明豈樂居巖數逢此百懼聊飲酒龔生未免不食亡
孔融竟落姦雄手想見龍眠下筆時佇目精神思尚友

欽定四庫全書

乾道稿
卷上

六

開圖我亦有遺恨不得執屨從其後

送周仲材罷官還婺女侍旁

仲材名楠湖州
今當縣平山

天風索索鳴枯桑天寒自茲繁雪霜故人別我向何許
蘭溪水深草可杭憶初識君上君堂論文許叅鴻雁行
三年還往少間斷惠好如此宜毋忘人生會合胡能常
君行我留增慨慷雖云吳楚數驛地書札便恐疎寄將
君才有如玉截肪不待雕琢成文章一官婆娑百僚底
衆謂寶器橫道旁問君此去何其忙金尊綵服樂未央

侂年盛事一門見父子持橐俱明光

張信州禱晴輒應以詩賀之

舍東舍西綠車鳴陂南陂北秧龍平共期今年好春事
自茲無苦惟須晴如何忽作十日雨農夫輟耕病紅女
爾曹惴惴何足云忍使憂形使君慮人言水旱有常數
豐凶不假祈禳助那知使君為民爾一念未萌神固許
朝來風色端何祥溪流復故山屏張欣然此屋盡和氣
使君之賜真無央

欽定四庫全書

乾道稿
卷上

喜晴

春風吹晴簷雨止蘭芽半吐梅堆委階前背蔭苔蘚深
曳杖不妨成細履浮生憂喜均何如誰能役役愁其軀
時閒意適且自慰莫問詰朝瓶乏儲

樂歲歌

早禾登場無餘粒晚禾結穗俱全實如聞自入夏秋來
十日一雨晴五日去年夏旱秋與同早禾半穫晚禾空
未云收穫告畢工十家九家愁歎中豈知今年有豐殖

父子相安妻反室東坡先生故嘗言民自天氏天定卹
我今千里方來歸釋擔先題樂歲詩其誰傳似閭里兒
乘時閑糴將安施

落星寺

我自廬山十五載奔走坐受世迫隘今年一夢落星灣遙
賞意短終不快褰裳高步千仞岡下視城郭等蓬塊陰
風遠來龍噫吟大江東下波滂湃遠游止為兩眸計扶
杖深歎造物大五老自是吾故人一笑却恨浮雲礙欲
搜短句記來游倚檻孤嘯上方外康州涪翁我所師借
問遺碑悉安在

欽定四庫全書

乾道稿
卷上

過女兒浦

青山我我聳髻鬢流水瑟瑟鳴佩環朝雲暮雨在何許
秋月春風空自閒予今老矣鬢且班行役殆遍江之南
舊遊渺邈大姑石吾家側近了頭巖

抵南康

江天漠漠江雲濕江波浩浩江鷗急二十年間幾經歷

欲論舊事俱陳迹舟人漁子笑且語不知客子行路苦
今夜解帆落星渚典衣市酒寬久旅

成父以子進釀法為酒酒成許分貺趣之以詩
併呈子進昆仲

蕪仙盡飲不滿勺平生願求酒方略空山松桂不使間必
使捐糜效斟酌自言坐客有酣適已雖獨醒同醉樂是
心可以付調元歎息鄉來湖海著邇來繼有孫夫子丈
高飲少俱蕪若如何喜釀又相似叔教典型亂今昨談

欽定四庫全書

乾道稿
卷上

九

間快說酒中病麀戰如遇將軍霍至其妙處殆神授后
稷播種神農藥冬葛近撒不老泉石室蘭溪望風卻我
時籃輿通過之靜掃玉亭供偃薄呼童洗觴置我前謂
我多寡隨人各詎須珠玉始脩容濡唇頓爾忘諧謔我
云此乃酒御史徑取橄欖充咀嚼庶幾正味兩相類祛
我沉痾屏無作我家是邦陋隨俗白酒釀來纔宿諾彼
人固肯號茅柴此意豈復知京洛阿連聞道愈於我換
米急拋居士屨不勞火齊撓妻孥要與論功上麟閣祇

今旬月計已熟沾溉況自有夙約醉鄉道路久生梗愁
城疆界思開拓便須健步速持似預恐有核窮搜索梅
公不與俗子對我亦竹門無鎖鑰但判醉倒更微吟萬
事休休還莫莫

近乏筆託二張求之于市殊不堪也作長句以
資一笑

詩老作詩窮欲死序詩迺得歐陽氏序言人窮詩迺工
此語不疑如信史少陵流落白也竄郊島摧埋終不起

欽定四庫全書

乾道稿
卷上

十

是知造物惡鐫鐫故遣饑寒被其體嗟我少小不解事
失身偶落翰墨裏年來百念已灰滅只有宿心猶在此
後來不作諸老亡冥行恐墮澗谷底雖云黃卷可尚友
糟粕詎能臻妙理率然有作每自厭一紙真成再三毀
庶幾撫藁望豐年亦學乘流到涯涘那知事迺有大終
藝未及成窮已至皆言詩工固可俟窮為先兆自應爾
生茲不復置追悔志在溫飽誠足鄙玄泓管楮日相從
固異小人甘若醴竭來中書忽告老一朝左右手俱廢

嘲風咏月不耐閒按圖姑聽求諸市我詩縱不稱犀象
葦管雞毛那慣使紛紛著墨與水浮勢如絲亂安得治
戲題滿几輒大笑翻憶兒時汗窻紙操舟無長病河紆
我詩固說當罪已僕舊詩云我無操舟長病河紆又聞工欲善其事
未有不先資利器作牋搜乞累朋友往往猶吾歎崔子
錦囊藤篋世不乏鼠齧蟲攻誰料理那知我輩有百艱
此事且然他可比

郡檄子肅檢視早田以詩寄之

欽定四庫全書

乾道稿
卷上

十一

是邦且熟無多收況於水旱相為憂使君奏課避非實
檄公按視臨田疇民間公來相告語活國憂民公自許
平時愛我如恐傷今胡不能為輕賦人生衣食固有端
作苦寧敢求自安分當戮力給公上何意年歲逢艱難
吾君德盛過文景詔書屢下民惟省公其為我謝使君
考雖下下民安枕

乾道稿卷上

欽定四庫全書

乾道稿卷下

宋 趙蕃 撰

五言律詩

題江貫道江行晚日圖

霞尾千山赤雲腰幾樹連若非彭蠡正當是洞庭偏歲
月驚飛鳥功名憶墮鳶開圖若有感歸思忽無邊

晨起

欽定四庫全書

乾道稿
卷下

一

入語村村好雞聲處處聞樹猶埋宿雨山未釋停雲俯
仰夏已度屈伸秋又分平生燈火念牢落嘆離羣

幽居多暇風雨兼旬山色蒼蔥禽聲在樹顧而

樂之因賦此

林雪乾留凍巖雲行帶昏幽人貪熟睡簷鵲故多言宿
潤微侵屨晨光漸滿軒倦能行竹迳閑且灌蘭盆

有以靈壽杖為貺周旋累年忽爾摧折感而賦
之

度嶺且萬里友于凡幾年忽驚同拉朽何敢恃扶顛躋
勝亡行具結趺聊坐禪山南與山北從此罷蹢躅

山行

晨起雨間雪晚行風送晴梅殘冰玉瘦林遠畫圖呈賈
客嗟長路農夫樂早耕余懷獨無累徒倚待詩成

清明

寒食又清明連陰得暫晴欲知春事晚已見綠陰成蝶
有俱飛逐鳥仍求反聲春衣期暖至短褐尚寒生

欽定四庫全書

乾道稿
卷下

徙居祖印寺

十載依脩竹今秋始一辭琴書與俱載風月故長隨四
海均為寓旁觀莫浪疑全家肯同住未媿鹿門期

郊居秋晚五首

舊歲早為虛今年雨以時如聞諸郡國可脫半寒饑我
自無田者空成樂歲詩誰官太史氏直筆要無遺
祇道秋蕭索木犀能再開驚看倚修竹便恐滿蒼苔花
瘦非疇昔香深有自來微吟真浪爾細折為誰哉

庭菊種匪晚秋風開爾遲人嗟地力薄我有歲寒期蘭

芷元同類蒿萊敢肆欺懷哉非失所社老謾街悲

松柏有正性風霜無橫侵南方異搖落衆木共青森曲

士應懷悅我曹嘗感心詩成誰和者絃絕未忘琴

霜雨飛何密窮秋易作悲長身竹孤瘦短髮草黃萎漸

過風霜迫誰無裘褐思向惟迓夏日今已念朝曦

催租人至作

竹屋煎茶罷風床散帙餘花殘蜂不至食盡雀來踈無

欽定四庫全書

乾道稿
卷下

客對揮塵有筇扶連除茲時潘處士詩敗為催租

端峯往還三首

振衣猶戶內發興已雲端問路非生境達人若素歡行

知近林遠望覺遠峯攢顧可資瞻眺胡能卹髀體

甚厭窮居陋聊為佛界邀追隨有逢掖應對屬方袍褊

性便幽隱畏途思避逃明當與山別回首念塵勞

暫住已積日此生知幾來飲客看天矯側足避崔嵬隨

意從登降無心計挽推雲寒易成晚家近故須回

小園早步

今朝欣雨止天氣漸清和
籬落小桃破階除馴雀多
占方移果樹帶玉數疏科
農務侵尋及吾寧久卧病

閏月二十日離玉山八月到餘干易舟又二日

抵鄱陽城追集途中所作得詩十有二首

推輪荒水磨漲潦失連湖
縱使非長路能忘去此都
未應為物役真復坐饑驅
好在佳山水懸應識故吾

草草朝成市忽忽客繫船
荒雞亂人語細雨雜炊煙
歲

欽定四庫全書

乾道續
卷下

月真前夢江山殆宿緣
沙鷗應笑我疎髻異當年

岸盡催撐渡風橫促解橋
傳聞記常歲偉觀得今朝
時

有疎鐘度誰云隔岸遙
明當絕溪去應為好山招

下水有放溜沂流多哭灘
人能等速事豈病艱難返

照千山赤春風兩鬢寒
生平慣行役無復漫悲酸

汭口成孤泊章巖說舊遊
征商毋見挽日暮自應休
煙

暝棲鴉樹沙昏宿鷺洲
浮生真泛泛吾道本悠悠

借石誰為主叫應呼莫謾
樓高纔隱約樹遠更峻嶒
掛

席凡三過停橈欠一登扁舟向何許
漂泊傍漁罾

樓殿何年寺檣帆別郡船
溪山妙圖畫并邑盛人煙
未

覺鄉音改空驚歲事遷
桃花知不遠底處覓真僊

不見千株樹空留百尺臺
仙人定無有行客自裴回
更

欲危欄倚生嫌莫色催
病僧多不出門外長蒼苔

望望龜峯寺行行番國船
林深寒日薄沙迥晚風顛
能

賦思孫楚同行有惠連
好詩相撥觸才盡不能宣
孫子

儀塵欲游龜峯不果經行
溪上恨不同載故及之

欽定四庫全書

乾道續
卷下

喚渡風殊慄穿林日向中
飛泉半崖落峭壁與天通往

者名猶在仙人事已空
徐巖不為遠歸去若忽忽

試登雲錦閣還上揖仙亭
揀宇雖摧落江山自典型
衝

風聊策杖晚日更揚舲
要寫吳江句初無六尺屏
孫子

揖仙亭上觀秋漲坐
我吳江雲水鄉之句

草草天涯棹悠悠江上鷗
琵琶千古恨蓑笠十年游
莫

向官亭泊閑為佛界流
明朝更西去依舊覓扁舟

定謗浦

棹掠湖邊浦帆收柳外橋蒲深映鳬沒浪靜覺魚跳紗
恰因眠側霜景倚醉搖春風空浩蕩客思只蕭條

富陽道中遇風感歎作

回首江山舊他年來往頻人誰無一飽汝獨值多辛泛
泛將何往悠悠魄此身懷哉松與菊白露及時新

將宿天心寺以失路遂止野人家

一出有百阻吾主何太艱問途迷野寺積淖落前山勢
必鷄晨待聊安虎落間濁醪無路覓破衲與渠關

欽定四庫全書

乾道稿
卷下

喜公擇之歸兼懷子崧三首

曾因避仇去竟作倦遊歸梅蕊經青眼緇塵染素衣湖

山新有得歲月舊成非小定能來否柴關夜啓扉

子去吾誰與諸孫共此悲幾經行役苦還讀寄來詩事

要規摹立寧憂寒餓為安知造物意於爾不吾私

建德老斯立近來雙鯉魚殷勤數稱子交友未慚余多

病誰如我微官政浼渠吾君方銳治何乃緩微車

悼亡

死別生難見生離死會逢休憑海山信浪覓少翁客春
院無新跡羅衣有舊痕昨朝桃李艷今日綠陰重

悼劉仲遠

名時待次
漳州別駕

平生遠齋老為說惠連賢制行有成德工詩稱舊聯幾
年徒慕想十載獲周旋別去吳中遠書無雁足傳

朝共阿戎飯暮同烏戍舟新詩蒙惠好顧我闕餐酬化

鶴驚何往觀魚事已休音容無日見巾屨想神游

不念過兄老忍遺諸子才結交予最晚聞訃亦深哀銘

欽定四庫全書

乾道稿
卷下

志誰為作松杉何地栽堂堂那復有皎日竟浮埃

五言長律

竹隱新籬

地迥闕虎落秋來逢鼠偷貧居乏給使力作費營謀鄰
近俱相集讙言卒未休濁醪澆渴肺香飯飽饑喉密篠
分新翠深林失故稠斬除才就束委積動成丘經布潛
依塹蛇行曲過溝周遭類屏障森列勝戈矛黃耳斯逃
責青檀好在不幽棲知有託高枕得無憂

七言律詩

呈趙叔侍郎子直二首

憶昨才聞召節趨江湖日月誦除書政迹去此不容忍
物望在廷誰得如豈但疲民望蘇醒更知寒士待吹噓
所期異日施行次不負于今拜獻初
潦倒三年白下官畏途常以此心觀未為廟令直不易
翻入帝城良獨難落落白頭游且倦悠悠青眼刺空漫
文章功用知無補保此不渝惟歲寒

欽定四庫全書

乾道初
卷下

侍郎周公不赴富沙士論推高以詩寄呈

人誰不慕直言名未有保持終不傾可使濁淫侵渭水
信於落月見長庚要令國有九鼎重自是身如一葉輕
常病此風今寂寞古涂荆棘賴公行

新淦道中呈運使錢侍郎

幾日陰霾闕不開今晨萬頃靜無埃山楓借潤旌旗色
江鳥忘機鼓吹猜詔獄務平勤駐節閭符兼總待還臺
扁舟又遇東隨微借此餘波亦快哉

同謝文簽判送趙台州至靈鷲簽判文通中有
詩蕃同賦

朝來細雨又微風逐我山行盡日中莫嘆籃輿碾泥淖
也勝策馬犯塵紅欲知風俗家家厚看取耕桑處處同
更訪百年垂白叟要聽舊事說元豐
是日同訪進士周
仁於玉田周以百
年得
官云

訪梅殊未有開意

不憚朝寒起杖藜問梅隨往到山蹊枯根半死苔痕剝

欽定四庫全書

乾道初
卷下

九

細蕾深藏藤刺迷倚市懸知無正態入空還恐見深擠
幽居空谷端可愧顧歎詩無老手題

次韻子肅秋日感興兼懷公擇二首

炎冷財分覆手間化機於爾見深慳歸歟君釣荆溪水
已矣我耕懷玉山幾羨脩翎辭世網絕憐駿足老天閑
區區莫有窮途歎了了要從初地還

秋盡誰無狐貉思一年行矣又垂垂顧慚志行如山立
敢為推遷作浪悲貧賤已知安少壯功名何有望哀遲

長安此際尤蕭索坐念故人應窘炊

十三日逆風舟行甚速

昨夜縱風幾喪生今朝沂水頗留行細看洶湧收帆脚
孰若夷猶聽漿聲客路了知難數傲長年謂我勿多驚
世間速速元同致莫問到衢今幾程

寒食前一日發黃堰明日抵定誇連日逆風吹

沙不可渡湖

故人留我過寒食意重寧同所歷家苦信長年貧道里

欽定四庫全書

乾道稿
卷下

十

翻成五日滯風沙擬從塔上占鈴語又見雲間起砲車
立遍津頭無數柳亂絲頻擺失樓鴉

兩日隨錢丈放舟恬無風浪今日別歸仍值逆

風作長句寄錢丈

大舸航高掠浦飛小舟宜短沂灘歸雖云來去難俱遂
自是神人相不違賴得好山看要熟不妨晚雨落仍微
遲回半日夫何歎於此因知造物機

雨中遣興呈遠齋父子孫丈昆仲

睡思昏然盡掩門覺來山雨已翻盆黃梅應熟騷人念

綠野可耕田父言林外竹鷄時自語階前花鴨故相喧

詩材滿眼費驅使此事合輸劉與孫

趣成父釀酒用子進家法故及其昆仲

入眼江梅皆好枝是中勞我幾懷思詩聲何止一頭出

酒事乃稱百室師

百室之醕醇碧
惟師浩翁語

聞道名方曾口授定

應買秫趁冬炊小須旬月釀當熟寄我茅齋不可遲

感懷

欽定四庫全書

乾道稿
卷下

十一

憶在兒童間混融江湖老矣再能逢潮音適伏門聞虎
神骨崢嶸霜後松粥飯暫應隨願力并春終可聽吾從
蕭灘灘上風帆發引領白雲何處峯

清明懷成父

只道今年寒食晴那知風雨在清明異鄉逢節自感動
何況此身今老生為底輕辭墳墓去不敢回首弟兄情
悠然強作江東望雲湧如山白浪橫

喜晴

地雖湖北稻為鄉歲比曾微一報穰望望雨晴求屢告
欣欣守尉德俱良共期負籠爭晴割敢愛當繁滴夜涼
更擬年豐酒初賤釣藤免飲澀如棠

五言絕句

漁村落照

落日千山赤平林一帶青翁方賣魚去孤櫂自橫汀
以坡公君如大江日千里我如此水千山底為
韻作小詩十四首重迭在伯蓋深有感于斯句

欽定四庫全書

乾道編
卷下

云

落此巖壑野宜從麋鹿群何知交友內而乃得夫君
何氏之從學源流遠有餘窮經類元凱能賦似相如
梗枓霜雪餘用之可以大蓬蒿束縛之世亦安取代
楚國千年數岷山萬里江湖為八吟筆政以落蓬窻
游從二年中離濶三百日政自述如疏不妨心故密
今日東陽郡城南尺五天胡為五溪行道里踰幾千
重湖岳陽樓五柳淵明里定復有佳人與之同徙倚

生兒思稱家人孰不欲可門戶冷如冰其尤莫如我
曾聞一夕語可勝十年書同舟數月程其得當何如
明經取青紫此謗亦已鄙至哉師初錄棄彼當在此
頻登采芹亭所樂非山水君今去我東愁絕重來倚
聞君射策日落筆字數千行看玉堂試潤步踵英躔
君行過吾里穢舟並南山王郎兩徐子非必素往還
崎嶇千萬山踏破青鞋底何似引章泉同耕老兄弟

題釣雪圖

欽定四庫全書

乾道編
卷下

一日得此圖于表弟劉和叔許弟令予作詩
因題數語竟未識舟中垂釣者果誰何耶跋
詩多矣而予之所知者四人曾丈宏父寓居
上饒溪南與先君游甚厚謝公景思於予為
表伯父德莊趙公嘗與武義叔祖同僚雅多
見其詩丈劉丈凝遠則予之所願學者遂表
而出之趙號介庵劉丈號遠齋云
空濛天外林璀璨岸頭石何許放舟回寂然方自得

沙鷗故飛飛湖雁更歷歷顧我亦忘機相看同一適

畫師端為誰釣者亦安在我不識若人相望大千內

曾恨因無遺謝興亦不淺人言介庵介我謂遠齋遠

六言詩

二十三日早霽

晴雲如衣如絮落月似鈎似梳鷓鴣鵲未覺一段併

能屬予

七言絕句

欽定四庫全書

乾道稿
卷下

五

喜晴

雨脚昏昏掃不空柴門未覺有春風晚晴驟喜聰明處

猶倚蒲團附火紅

梅花已逐凍泥空留得餘香傲晚風春事十分財入手

與愁病眼眩青紅

掃除詩癖未能空從使人譏手病風事業深虞一無就

壯顏都有幾時紅

兩公賢比道州陽總為勤民鬢已蒼喜雨喜晴俱有賦

樂憂寧止為詩昌

晚霽

雨歇蟬聲抱木悲茅簷獨立看雲移一陰十日不見月

想見清光分外奇

帖俞王諸君求筆

顏公筆法有家法篆隸料得皆千金聞道公張過親友

可能乞我助呻吟

成父期以十八日至已而爽約

欽定四庫全書

乾道稿
卷下

五

已是覺然誤足音更堪疎雨過平林呼燈自舉一卮酒

顛倒海濤尋破衾

子浦常令成父見問老杜海濤乃在短榻就僕為談僕笑曰榻且可用

食豈不可耶

雨後晨起懷斯遠

夢過百花蝴蝶飛可堪朝暮子規啼山中有屋不歸去

想見當門碧草齊

百鳥喧嘲工敗眠靜聽黃鳥獨清圓何云綠竹不如肉

佳處政因出自然